



齊庶人搏

齊庶人搏洪武三年封青州府十五年上令出獵

開平且備胡二十四年春勅再出開平時潁國公

傅友德總兵諭勿相叅奏凱勿矜功八月秋高水冷

回京建文時有告變者名至京廢爲庶人時周王已

削爵與搏皆繫禁靖難兵至急遣兵諭二王二王不

知靖難兵也大怖伏地哭已知之乃大喜曰吾屬幸

不死矣永樂改元復封又封其子賢熒爲樂安王賢

竣長山王賢烜平原王搏之國驕縱上輒書諭戒

來朝又面諭搏曰無忘患難時搏益自疑陰蓄亡命

養刺客僭帝號爲呪詛輒用護衛兵守青州府城北門自廣智門外接園苑築牆截往來守吏不得登城夜巡李拱曾名深等上變告搏匿其人滅口三年賜書索珙論搏改過是月周王橚上書悔罪上封橚書示搏明年來朝面謝廷臣劾搏罪請論如法搏厲聲曰奸臣喋喋無乃効建文時殺我會須盡斫此輩上聞之益怒畱搏京邸奪其護衛指揮柴直等伏誅罷遣罪斥府諸寮盡出王繫囚及所造不法械器羣臣又請罪教授葉垣等上曰齊王凶悖縱恣性習使然朕與王君臣兄弟出之囹圄寵以祿爵恩

禮渥洽誠心溫詞開諭至六七不悛教授輩奈至何況垣等皆先自歸發其事可勿論搏畱京益有怨言乃召其子至京父子並奪爵妃吳氏先卒葬青州宣德三年福建妄男子樓濂詭稱七府小齊王建陽人製王冠服謀不軌縣發其事械至京誅數百人搏及賢燧三子暴卒景泰五年五月勅南京守備參贊齊庶人谷庶人安置廬州者移置南京慎防之時齊庶人賢懌搏少子也尚幼谷庶人絕而齊庶人請得谷庶人第嘉靖十三年釋高墻庶人長鑿者搏曾孫也

潭王傳

潭王梓母達定妃洪武二年纔二歲受封封十五年
之國王幼聰敏好學善屬文嘗召府中儒臣試設醴
賦爲品高下出邸中貲爲賞洪武二十三年妃與民
家坐事王不自安上遣使慰諭且召王入見王大懼
與妃自焚死無子國除

吾學編

趙王傳

趙王杞洪武二年生明年四月封趙王封之日秦晉
燕吳楚五王升殿受冊寶齊潭趙魯四王幼內宮保
抱抱四王就位保抱抱受冊寶也又明年杞卒

吾學編

魯王傳

魯王檀母郭寧妃其妃湯信公女王生兩月而封洪武十八年之國兗州幼聰敏好文學善詩歌好餌金石藥二十二年發病卒命禮部尚書李原名議喪禮上曰父子天性謚法公義朕不得以私恩廢公義可謚荒子肇輝永樂元年嗣王宣德初上言長史鄭昭賢而老請致仕上諭蹇義曰魯王賢禮士宜如請宣德九年卒謚靖子泰堪成化三年嗣九年卒謚惠子陽鑄成化十二年嗣嘉靖十二年謚莊世子當從早卒嘉靖十三年以孫觀焯嗣王贈魯懷王懷王

子健茂封世孫早卒以子觀焯王贈魯悼王

吾學

王以狝年嗣位事多不檢十六年館陶王當溎等聞

於朝詔奪護兵三之二二十八年卒謚端二十九

年庶子順坦以寶慶王嗣嫡一子壽鑄封世子

年卒謚溫肅

繩蟄錄

魯藩靖王肇輝

魯靖王諱肇輝荒王長子也恭儉謹度文皇帝甚

重之車駕北巡過魯王來朝賜以詩幣洪熙元

年王獻瑞粟有一莖至二十穗者紀善王貞左史鄭

昭在王國輔導積三十年請老宣德元年春王為言

於朝詔以王賢而禮士特從之予誥命致仕王

國六十四年成化二年壽七十九薨

輔國將軍當濟

輔國將軍當濟魯鉅野王諸孫也慷慨有志節嘉靖

三年春上書請停郡縣主君卹典以蘇民困嘉靖七

年奏辭已祿并男奉國健榑祿米一千四百石佐縣

官疏通運河賜勅獎諭是年秋又上疏言各藩郡

縣主君先儀賓沒者故事儀賓得支半祿今四方災

傷邊陲多事民窮財盡而各儀賓暴橫侈縱多不法

請勿限品級月給喪偶儀賓折色八分明年濟又請

以父子應得祿糧佐賑封內饑民因勸 上法 祖
宗重國本裁不急之費息土木之工詞甚剴切 上
嘉其意在卹民且以節儉獻規特勅褒之不聽辭祿
奉國將軍健根

奉國將軍健根魯鉅野順僖王諸孫也博通經術能
文詞多所延納凡宦遊堯中者無不知將軍名每會
坐客恒滿將軍據上席握鐵如意談理疊疊不勸嘉
靖中魯王以將軍賢孝 上聞下詔褒予年七十有
八乃卒子觀樞字中立爵鎮國中尉被服儒素雅好
著述執母孔淑人喪蔬食移年哀毀骨立嘗繪太平

圖一卷上獻 世宗皇帝嘉獎之 賜承訓書院名

額并五經諸書所著濟美堂稿畫法權輿若干卷又
輯齊魯名士詩二十一卷名海岳靈秀集弟觀錡亦
以詩畫著名嘗請辭祿廬父墓未允 潘獻志

魯藩輔國將軍毅齋公暨配夫人王氏合葬墓

誌銘

于慎行

公諱觀炊字某別號毅齋其先魯靖王之世也封於安丘三傳爲榮順王有子六人最少者曰竹涯公健橈誥封鎮國將軍配曰張夫人夫人諸姬有子五人公在叔季之間母曰蕭碩人詔選名家子也公生而穎慧英英吐奇五歲奏賜今名以嘉靖某年受封輔國將軍輔國之秩二品古稱八命於法貴倨矣而公內敦孝友外修退讓孜孜砥行不敢以世祿驕人德義日有聞也其侍二親之疾衣帶不解葬而徒跣扶

與哭號百里國人慕之諸生上狀御史且爲奏褒公
謝弗願鎮國王子祿厚貲產頗豐公與兄弟中分讓
腴取獮曰幸奉國恩食租衣稅不忍以父產傷同氣
心然公廢積貸予什一取贏久之家更饒裕而居常
誦薛公之市義也一日召子錢家盡取其券焚之所
捐金數千兩穀數千斛子錢家頓首祝釐有下泣者
而公名大譟魯城中矣滋陽恭裕王家匱而孱病而
爲公泣以弱小孫爲寄及壯當封而爲疆宗所持莫
敢保任公奮曰此王適也策在天府何罪而翦之茅
遂與安丘府主及中立公同署名焉又出橐金數百
及多爲假貸滋陽以是得封奉公終身如大父禮安
丘家監以王少子登城爲邑令所誰何邸中諸少年
欲往譙令公聞遽止曰諸君胡不自喜至欲辱天子
吏以扞三尺王少子出無輿衛令何用識之衆皆曰
然遂解胥史有逋帑金而逸者長吏捕得榜掠幾死
荷校及門而乞公助之金若干乃不問其姓名或請
爲券公曰人方身無完膚三日不食忍責其券耶曲
阜孔生弘煦推擇爲令從公貸二百金命下而弘煦
死子姪以田及器物來償公愀然曰所爲貸而公者
義也而公不沾斗食而死而吾收若田及器物爾曹

何用爲生盡却弗受魯人益尊信公稱爲長者公爲人偉丈夫也白晢修髯眉目如畫進退容止甚修少時嗜學好古北面經師多所誦覽又工爲歌詩及曲咸有意致第中小築亭苑環植花竹日召故人賓客觴詠優遊爲樂未厭而無聲色萃侈之娛旣以好義立名遠近赴之如響於屬又尊宗人推爲祭酒緩急質成凡公所調護無不人人厭其意者雅有口辯談說古今纏纏有味小大成樂聽焉公生嘉靖己丑九月二十六日卒萬曆己亥四月六日得壽七十有一子男二長頤縱次頤鏞俱封奉國將軍

蜀王傳

蜀王椿母郭惠妃滁陽王女也洪武四年生生十一年而封成都惠妃生王及代谷二王永樂汝陽二公主王元妃涼國公女王讀書好善近儒生能文章

高皇呼爲蜀秀才未之國歲清明遣祭滁陽王墓於滁州之國初卽聘漢中教授方孝孺教世子待以賓師禮推恩母族歲時問遺不絕常發祿贍郡教授月一石當是時邊王歲出塞征胡王以雅好學問守西垂安靖與民休息永樂三年來朝二十一年卒謚獻六子長悅嫌次悅耀悅燿悅忻悅焯悅悒悅熒早卒

謚悼莊世子嫡孫友堉永樂二十二年嗣初友堉爲
世孫叔華陽王悅燿謀奪適獻王怒斥去不悛囚而
繫之又不悛益怒誣友堉罪於朝 文皇召友堉叔
姪自明比至 文皇崩 仁宗察悅燿誣世孫得嗣
王之國未幾悅燿又走京師誣友堉 仁宗怒抵奏
地下曰適庶大倫干分誣親獨不畏鬼神乎謂侍臣
曰悅燿虧忠孝懷奸讒使歸蜀終亂其國徙武岡州
又徙豐州宣德五年友堉府中忽舉炮銃總兵陳懷
聞上罪府官 上還護衛三之一已而請王府官屬
留軍中南人爲匠皆從之宣德六年卒謚靖無子宣

德七年弟友堉以羅江王嗣友堉獻王孫靖王母弟
也宣德九年風疾 上念王賢走醫調視未至卒謚
僖無子叔悅焯宣德十年以保寧王嗣儉飭守禮法
天順五年卒謚和子友垓善草書天順七年以世子
嗣是年卒謚定子申鉉天順八年嗣成化七年卒謚
懷無子是年弟申鑿以通江王嗣好學能文弘治六
年卒謚惠明年子賓瀚嗣仁厚好儒術正德三年卒
謚昭明年子讓栩嗣嘉靖十五年守臣言王忠孝
上特褒賞二十年上黃金千兩白金萬兩修宗廟加
祿歲二百石玉帶一王受玉帶辭祿世子承鑰

二十六卒謚成子承鑰二十八年嗣三十七年謚
康子宣圻四十年嗣

繩螿篇

蜀獻王椿

蜀獻王諱椿 高皇帝十一子也洪武戊午歲 冊

封二十二年冬之國成都王孝友慈祥博綜典籍容
止都麗雅有儒素風嘗奉 命中都閱武卽闢西堂

延攬名士李叔荆蘇伯衡等商榷文史 高皇帝常

以蜀秀才目之及就國聞漢中博士方孝孺名以幣
聘爲世子傳嘗臨講郡黌覩諸博士清貧爲分祿餼
之月一石遂著爲令府中屬官有能進昌言者厚加

禮遇沒世猶存恤其後燕居之闈大署忠孝維藩以
自勵焉谷庶人穗與王同母而穗數蓄異志所爲多
不法會王子悅燻獲罪於王走之穗所穗因詭衆謂
燻爲建文君欲名號倡亂永樂十四年秋王上書暴
穗罪狀於朝 文皇帝報王書曰穗潛萌異志張與
嘗再言之兄未信今得賢弟書具有實事人之無良
亦至於此賢弟此心周公忠存王室之心也賜王黃
金二百兩白金千兩鈔四萬錠玉帶一束龍袞九紵
錦羅紗綵繒諸物稱是乃下詔正穗罪奪其爵爲庶
人已而王朝京師復賜白金三千兩米萬石雜紵紗

羅絹二千疋馬百匹火者百人永樂二十一年二月
薨 上悼惜良久特謚曰獻所著文章名獻園集若
十卷

蜀定王友垓

蜀定王友垓和王之子獻王之孫也嗜學善書能文
章克纂獻王之業著文集十卷子惠王申鑿尤警敏
好文敬禮才名士弘治六年薨著惠園集若干卷惠
王之孫讓栩是爲成王性靜哲喜儒不邇聲伎動遵
禮法創義學修水利賑饑救災多所全活嘉靖十五
年冬撫臣吳山按臣金燦以王行誼聞 賜勅嘉獎

署其坊曰忠孝賢良嘉靖二十六年薨

藩獻志

湘王栢

湘王諱栢 高皇帝第十二子也母胡順妃洪武四年生洪武十一年冊封之國荊州王粹美嗜學讀書嘗至夜分篝燈警枕精思入微人莫能窺其際開景玄閣招納儒乂日事校讐志在經國論古兵制有宿將所不及者膂力過人握弓矢刀槩馳馬若飛嘗受命征常德叛虜敗之馬渡殲焉洪武三十年五月同楚王討古州蠻夷克之出入縹囊乘書以自隨遇山水勝境輒徘徊終日勒石記事平居被服儒雅尤善道家言常自號紫虛子建文初疑忌親藩或有告

王反者 朝廷遣使卽訊王懼無以自明闔宮焚歿
謚曰戾王 成祖靖難後改謚曰獻爲置祠官守其
園 藩獻志

代王桂傳

代王桂其妃武寧王女洪武十一年封豫王二十四
年改封代王明年之國大同建文時廢爲庶人靖難
後復封宣德二年王請得樂器制器王妃仁孝文皇
后妹也王不悅妃妃病王不視孫仕壘聞於朝乞勅
潞城王遜炆啓王善視妃九年王欲率諸子孫來朝
不許王又與其子遜炆遜焞褻衣冠遊行市中袖錘
斧傷市人 上與書戒飭稍斂戢正統十一年卒謚
簡十一子世子遜熾早卒正統十三年以子仕壘王
贈代戾王仕壘正統十一年嗣嘗上言總兵郭登有

功大同虜欲得大同爲巢穴非登大同不能守 朝
廷爲勞登天順七年卒謚隱子成鍊嗣弘治二年卒
謚惠子聰沫嗣坐罪徙山西省城弘治十一年卒謚
思子俊杖嗣嘉靖三年大同軍叛王東走宣府 上
遣光祿少卿蕭淮問王嘉靖六年卒謚懿九年子充
權嗣請郡王庶子祿禮部言郡王庶子無長兄得嗣
郡王者封長子不復得支將軍祿長孫亦如之不許
十一年大同軍又叛王東走宣府 上又遣官問王
王父子再遭禍變忠慎自檢得不爲諸逆染鱗十八
年秋樂昌王乞徙代州禮官周旋得徙朔州禮科都
給事中丁湛上疏曰樂昌一府以城域狹隘物價騰
貴得徙代王亦以是爲請何以應之天下宗藩類皆
聚處一城亦皆以是爲請又何以應之况代藩北控
邊鄙南輔圻甸比之他藩尤爲要重數年以來叛者
繼起稔惡不悛皆積疑所致近甫少寧王宜休息示
以安靜乃今宗親無故改遷搖惑衆志不可已而樂
昌王竟徙朔州先是景泰五年昌化王任潭言大同
地瘠乞移封就祿便養景帝亦不許 吾學編

充耀嗣王二十六年卒謚昭庶一子廷埼封泰興王
二十八年嗣三十年王捐祿銀五千兩以濟選軍之

用上以忠義可嘉降勅褒之萬曆元年卒謚恭庶
一子鼎鉉封太平王萬曆三年以貪暴兇肆革冠服
戴罪管理府事歲給祿米三之一准五年後能悔罪
自新撫按奏請定奪

繩螿錄

靈丘端懿王

靈丘端懿王聰漏代簡王之玄孫也長子俊格嗜學
善屬文聚書數萬卷尤好古篆楷墨蹟嘗手模六十
餘種勒石名崇理帖世宗時獻皇儲明堂二頌
又上睿宗章聖輓歌賜金幣嘉獎著天津集若
千卷嘉靖二十四年卒端懿疏乞封其孫廷址爲曾

長孫禮官以無典故可按第靈丘四世嫡長宗室盛
事應擬曾長孫封號上嘉王壽考宗室鮮比特許
之已而復封址子鼎鑣爲玄長孫嘉靖三十四年端
懿乃薨壽八十三鼎鑣襲高祖爵

濟甯志

大明靈丘榮順王墓誌銘

趙 致

代府靈丘王實系

太祖高皇帝一世孫

代簡王

之六子甫十歲

宣宗章皇帝賜寶冊封爲

靈丘

王配郭氏冊爲王妃奏娶馬氏封爲王夫人先居大

同王自授封日見英邁勤學好問手不釋卷凡過日

遂不忘發爲詩歌溫厚典雅率多奇句有雲溪稿千

餘首修身慎行揖遜謙恭不啻聲色貨利所行者惟

忠孝仁義濟人利物絕無吝容克遵 祖宗成憲而

罔敢怠荒尤敦睦倫彝敬待斯文從容自如未嘗疾

言遽色故父母兄弟稱其孝友鎮守大臣服其賢能

遣醫
治疫

適世孫幼上簡賢三勅推理國事幾十有五年維持
有道綜理得宜致基業益饒裕及世孫成立遂怡然
以退平居優游以琴碁書畫爲樂王昆季二孫甚蕃
衍於時當道者以雲中爲邊郡大兵駐劄之所地隘
不堪以居遂封章 奏請之國絳州益慎持守始終
一致王聰敏無所不能尤精於醫頻年瘟疫流行死
者甚衆遣醫載藥遍詣鄉村治之給至三萬餘貼遇
井亦投以避瘟等丹使飲水者不染患全活者難以
數計成化壬辰久旱不雨王竭誠親詣壇廟請禱大
雨如注三日方止民皆焚香叩門稱謝以爲非德與
誠敬不能動達好修善事敬禮神明屢有感格晚年
忽遘腹疾年餘醫不効成化十一年八月九日自度
弗能起命移居正寢先名適長子諭之曰生死常理
不足爲異繼承王爵務須慎重以永其傳次諭諸子
儀賓皆當謹身節用毋廢職謂妃郭氏曰素賢能不
以我憂垂白相守至願已足今與汝永訣再諭夫人
馬氏以如斯言也言訖瞑目安然而逝子七長 欽
賜名仕塲今爲王儲次仕殼仕斐仕壻仕塿仕塿仕
堙俱封爲鎮國將軍

肅王傳

肅王煥洪武十一年封漢王二十四年改封肅王於甘州建文元年乞內徙蘭縣永樂十七年卒謚莊庶長子贍焯二十二年嗣正統元年言甘州舊邸改都司而先王墳園尚在乞畱近邸林木從之府中嘗被盜劫榜募告捕者賞馬銀御史以聞罪其長史楊威又請加祿宣宗曰洪武永樂間肅王歲祿五百石莊王不言者以朝廷念地遠輸轉甚難故也仁考卽位加五百石矣朕遵祖訓不敢違天順八年卒謚康子祿埤成化四年以洵陽王嗣十五年卒謚簡

子貢錄成化二十三年以汾川王嗣正德中爲諸子請菜戶不允嘉靖十五年卒謚恭子真於弘治四年封世子嘉靖五年卒謚安和次子弼枕初封鎮國將軍嘉靖十一年改封世孫十七年嗣王贈其父肅靖王

王 吾學編

四十一年薨在位二十四年壽六十三謚定嫡一子縉烱六年生十年封世子三十六年薨壽三十一庶一子紳堵二十七年生四十二年嗣贈父昭王四十三年薨在位二年壽一十七謚懷無子靖四子鎮國將軍弼柿卒庶一子輔國將軍縉熿倫序及之

禮官論以越世 世宗准本職奉祀理府事議繳還冊寶罷諸司衛儀等衙門 穆宗卽位定妃吳氏及延長王真澆等奏以邊陲藩屏宜得王重鎮上言聖祖以羣雄定天下報功駕馭之典有隆弗替臣祖莊王受封茲地操練屏衛征剿勤苦反不及勲武之臣而涉於親堂之疑其何以安內攘外凡數百言上准襲王食本祿禮官仍議以郡爵理國 上特批出着襲肅王隆慶五年嗣

繩螿錄

遼王傳

遼王植洪武十年生母韓妃也生二年封衛王改遼王國於遼東廣寧城廣寧五衛盡屯田給王祿王得巡邊出塞練簡士馬已而坐罪奪祿衛靖難兵起渡海歸朝改封荊州 文皇卽位來朝卒謚簡子貴烜嗣正統元年府臣乞加祿 上言簡王得罪 朝廷太祖特加原貸削其護衛止與校尉三百人 仁宗令王嗣倍加祿得支二千石 宣宗又與旗軍三百人 朝廷親親已至王於庶母諸弟寡恩府臣不聞匡正直爲王請加祿不允四年坐滅絕天理瀆亂

人倫廢爲庶人簡王第四子貴燮以興山王嗣卒謚
肅子豪盛嗣世子恩鏞卒謚榮穆王請以世子妻妾
殉葬 憲宗不許卒謚靖子恩鏞嗣卒謚惠子寵沒
嗣卒謚恭子致格嘉靖三年嗣卒謚莊子憲櫛初封
句容王嘉靖十八年嗣

吾學編

隆慶二年有臯國除熾性淫疏喜方術有荊州衛指
揮王朝彥監生鍾應斗應山王教授子杭州生員宋
章甫及方士顧通誠劉洞玄李一山等朋比蠱惑樂
工吳江門隸申觀光性姿嫵媚熾尤寵愛又有民校
劉廷瓚軍校王鵬吏王世臣劉鸚及王漢任良等皆
親任用事遂以第二女選章甫男宋荆陽爲婚納授
江典儀觀光典寶鵬廷瓚各金吾指揮世臣鸚各引
禮周文憲等俱有冠帶洞玄等以法書符呪時時干
之欲得生氣人頭爲用遂令校尉施友義將醉臥街
民顧長保割取其首一城驚視不敢誰何假修玄請
於世宗賜號清微忠教真人及金印嘗法衣法冠前
列諸神免迎牌拷鬼杖入齊民家爲高功勒取謝禮
無算先是熾之幼也光澤榮端王寵濼理國事睹熾
恣睢不法時時勸諭熾銜之後誣其子致標聚麀之
醜每出遊闐闐沙市不備法駕從數十輩遇少年男

女美色者擁入府中淫污漸收婦人數多建三宮以處東曰雙蓮樂婦陳五兒領之西曰芳華揚州顧氏領之又曰曰裕昆王安然領之各鑄銀印收掌廣元康僖王致樞薨有美妾月娥翠兒蘭香等嬪皆收之宗室致槻母黃氏嘗以事見嬪嬪悅之哄至密室逼姦不獲乃絕其飲食六日不死生置棺中在廊門外焚之儀賓趙儒妻原陵縣君嬪祖姑也誘致府中姦之先是納娼張大兒生子川兒育于鵬家漸長請名儀賓李世榮張棟郭興爵等欲發其由嬪卽將世榮挈至寶訓堂打死竟朦朧得請賜名術璽巴東府奉國中尉致楠請封嬪不行楠咎徐彥華檢置嬪大怒令杜芳縛草人爲楠形以李明監斬於楠門大都上自宗姓下逮齊民一有觸忤百計摧折必有重賄始得保有身家不則其旤叵測長史越民表見嬪非人所爲每前稱說古賢宗事以感動嬪嬪不悅良醫單栢被寵謀掌已革宜城府印信表曰國憲誰敢干之嬪曰必不得已關防可表又曰國憲誰敢私之嬪益怒百方阻抑表遂托以目疾辭歸嬪遂自掌司印名爲統攝司事而諸務令王鵬發落名爲分理司事前後宗室請封各定等級勒取使用貧難如松滋等王

府嫡庶子女一百四十一位竟便過期不得名封
世宗晏駕 詔至不衰不哀巡按御史陳省爲列其
事上遣刑部侍郎洪朝選錦衣指揮程堯相勘明削
去世封送發高墻術壘武昌安置

繩蠶錄

慶王傳

慶王梅母余妃洪武十一年生二十四年封慶陽二
十六年徙韋州建文三年冬移寧夏 文皇令歲一
至韋州度夏宣德初上言寧夏卑濕水泉惡乞仍居
韋州不許許歲一往來韋州如 文皇時未幾護衛
人告王閱兵造戎器購天文書 上書諭王小人誣
叔祖置之法慎勿疑內臣馬安住居自寧夏言王以
謗故不自安 上又書慰王五年王請入朝不許王
遂請移家寧夏如永樂洪熙得往來韋州許之正統
十三年卒謚靖子秩燧十四年嗣景泰元年以虜數

入寧夏與其弟安化王秩炆上書乞徙內地不許又
言冕服以紗製請易紵絲 上曰 祖制朕不敢易

成化五年卒謚康子邃璽成化七年以平涼王嗣十
五年卒謚懷弟邃塤成化十七年以岐陽王嗣弘治
四年卒謚莊子寘鏊弘治七年以洛交王嗣十年卒
謚恭子台浚弘治十六年嗣時虜數入塞賊發恭王
墓嘉靖四年謀不軌法司請如代王聰沐例徙西安

上不許降庶人畱邸歲與米三百石已又不悛徙
西安其長子肅櫜封世子攝府事十二年世子及懷
王妃王氏乞恩畱台浚故邸禮官執議不可十五年

兩宮徽號詔許台浚還邸與冠帶

吾學編

三十年卒謚定世子肅櫜先卒謚端和庶弟肅枋以
桐鄉王進封世子三十二年嗣萬曆二年卒謚惠世

子倪熿萬曆

年嗣

繩螿錄

郡王安化反誅絕安化王寘鐸者慶靖王曾孫也祖
秩炆慶靖王第四子永樂十九年封安化王謚惠懿
父邃塤封鎮國將軍弘治六年贈安化榮和王寘鐸
成化二年封長孫弘治五年奄瑾擅權毒亂天下寘
鐸遂起逆謀告生員孫景文曰日者言我有帝王骨
相覲王九兒降鸚鵡神妄言禍福每見寘鐸呼老天

子寘鑄益冀望非分會大理少卿周東度田寧夏倍益頃畝索厚租徵馬屯租甚急景文謂寘鑄曰殿下欲圖大事大事此其時矣寘鑄遂爲酒名都指揮何錦周昂指揮丁廣謀反以誅奄瑾爲名是年四月五日寘鑄爲酒大會巡撫安惟學總兵姜漢周少卿李奄奄及漢至巡撫少卿辭不至錦等矯言虜入塞急呼壯士申居敬等捕虜執兵械跨馬呼噪儀賓韓廷璋等伏府序下錦等趨安府椎門入序中伏兵起殺漢及奄走行臺殺惟學都指揮楊忠又殺周少卿縛疾叅議放獄囚焚官府劫庫藏奪河舟大索慶諸王將軍金幣萬計呼召逆黨平虜城千戶徐欽引兵入城僞造印章旗牌又令景文爲僞檄言瑾蠱惑朝廷變亂祖法屏棄忠良收集兇狡阻塞言路括斂民財藉沒公卿封拜侯伯數興大獄羅織無辜散遣官校脇持遠近張綵劉機曹雄毛倫文臣武將內外交結意謀不軌今特舉義兵清除君側凡我同心並宜響應傳布邊鎮以錦爲討賊大將軍昂廣左右副將軍景文軍師張欽先鋒將軍魏鎮等七人都護朱霞等十二人總管當是時遊擊將軍仇鉞陷賊中欲起兵擒賊自效恐河東兵未集稱病臥鉞蒼頭潛入城

言副總兵楊英都指揮韓斌延綏副總兵侯勛遊擊將軍時源各率兵屯河上廣武營都指揮孫隆焚兩壩掃捲河舟盡奪泊東岸矣鉞喜尚稱病臥錦率都指揮鄭卿等三千人出覘渡口畱昂守城昂問鉞病鉞猶稱病不起伏諸蒼頭俛昂入殺昂鉞卽起開門一呼諸游兵壯士楊真等聞之卽趨安化府殺朱霞等十一人擒寘鑄及其子台潛遣古興兒密告鄭卿令反正卿遂殺魏鎮等十人錦廣走追擒之賀蘭山外朝廷聞變遣都御史楊一清太監張永督諸軍討賊未至寧夏賊平一清永至陝械寘鑄錦廣等至京頌繫寘鑄諸王館錦廣等下錦衣獄廷鞠伏誅弟寘鏐寘錫坐黨廢庶人將軍肅材俘至京旣論死正德中山僧大千和尚者富財凌同類同類毆和尚和尚憤曰我皇帝家人也衆異其言聞於朝逮至京下刑部獄和尚曰我安化府肅材也衆不能辨安化宮人左寶瓶在浣衣局名驗和尚寶瓶咤曰此肅材殿下得免死送高墻竟不知當時代肅材死者誰也

吾學編

寧庶人傳

寧庶人宸濠寧獻王權世孫也洪武十四年封獻王於大寧大寧在喜峯關外古會州地洪武初設北平行都司大寧城中東聯遼東西接宣府爲巨鎮文皇時封北平以每歲秋九月會廣寧遼王及寧王宣府谷王大同代王太原晉王西安秦王韋州慶王甘肅肅王出塞捕虜名肅清沙漠以故諸王皆有重兵文皇靖難初與諸將議曰曩余巡塞上見大寧朶顏諸夷驍勇善戰戍卒皆閭左罪謫不能寒吾得大寧斷遼東得胡兵助戰吾事濟矣乃令世子居守率

銳卒千人倍道趨大寧遺書寧王言窮感求救吾弟
王邀 文皇單騎入城執手大慟言不得已至此南
兵百萬旦夕且破北平非吾弟表奏不可寧王爲草
表謝請赦居數日款洽不爲備北平銳卒伏城外諸
親密吏士稍稍得入城遂令陰結諸胡酋長及思歸
之士皆喜定約 文皇辭去寧王餞郊外伏兵起執
寧王擁入關諸胡戍卒一呼皆集守將朱鑑不能禦
戰沒總兵官都督劉貞遯還京師行軍都督陳亨皆
降燕於是靖難兵益強當是時寧王善謀時草檄傳
諭靖難後遣內官書諭王再三王入朝相見甚歡因
乞改南土初欲得蘇州 上曰蘇州圻內不許又欲
得杭州 上曰五弟初封錢唐爲吳王 皇考以爲
不可改開封建文無道封其弟允熲爲吳王竟不克
享建寧荊州重慶東昌皆善地惟弟擇焉寧王得書
遂出飛旗令有司治馳道 上大怒王不自安屏從
兵從五六老中官走南昌稱病臥城樓乞封南昌
上不得已卽藩司爲府改封王已而人告王誹謗巫
蠱事 上書諭王王不自安稍稍自斂戢 仁宗卽
位乞朝京師又言江西非其封國請改封 上諭王
叔受封先帝已二十餘年朕不敢違 宣宗卽位以

大父行又復輒恣橫請於封內選子女不許重違其
意賜女婦八十四人王令省中官服朝服用天子儀
仗賀王元旦長至千秋節習儀鐵柱觀副使石璞聞
於朝乞罪其長史王堅朝議定宗室將軍祿米視品
王抗言宗室安得有品詞不遜時漢庶人方以反誅
上答書詞甚厲云將軍中尉有品 祖訓也王不
得棄 祖訓肆煩說王卽不謹非獨羣臣有言不巳
天下人心亦不容巳徒恃尊屬誣鱉朝廷典憲俱存
朕不敢庇未幾又乞灌城田不許稍斂戢托志神仙
正統十三年卒謚獻子盤斌未嗣卒謚莊惠世子景

泰元年以子奠培嗣王追封寧惠王奠培以世孫嗣
王景泰七年坐事革護衛弘治四年卒謚靖靖王長
子覲錫天順八年封上高王弘治五年嗣王十年卒
謚康康王庶子宸濠母馮針兒故娼也弘治八年封
上高王十二年嗣王濠輕佻無威儀好弄喜兵嗜利
狗色凌宗室瀆亂無禮養死士爲羣盜江湖間及劫
郡邑府庫財萬萬計術士李自然李日芳妄言濠骨
相天子也濠時時訶中朝事聞謗言輒喜聞言 明
聖朝廷治卽怒不應正德初通逆瑾賂金錢無算得
復護衛安化王反瑾誅革護衛未幾復結錢寧諸權

奸又得復護衛益大肆擅殺都指揮戴宣逐布政使
鄭岳御史范輅幽知府鄭璫宋以方盡奪諸附王府
民廬副使胡世寧言王橫無道不早裁抑禮樂征伐
不復出自朝廷濠出金璧萬計遣奄余欽入京徧遺
中朝內外文武大吏朱寧蕭敬張雄張銳江彬陸完
石玠欲殺世寧不果謫戍遼東自是益復無顧忌日
與李士實劉養正王春謀不軌又見 武宗巡遊東
宮久虛令典寶萬銳益賂諸奸佞欲召其子大哥入
京以上廟燒香爲名幸事萬一成得自取正德十二
年府典寶閻順內官陳宣劉良上變告濠疑出承奉
周儀意盡殺儀家及典仗查武數百人令承奉劉吉
持金錢又徧遺諸權奸佞幾殺順等於是逆謀益急
妃婁氏累泣諫不聽大集羣盜凌十一閭二十四吳
十三等數千人置丁家山諸處四出行劫置奄畢真
鎮守浙江約起事爲應又約廣西土官狼兵及南贛
峒蠻是時士實養正春吉銳日夜與濠謀恐起事以
反名人心未服伺一日宴駕大位未定乘變卽起萬
一事成益遣奸黠盧孔章等分布水陸孔道萬里傳
報浹旬往返踪跡大露朝野皆知濠旦夕必反巡撫
都御史孫燧日夜防遏濠托勦賊名置郡邑城郭兵

食事甚悉嘗歎曰卽賊起吾不滅賊賊必以吾所處分故速滅又連上七疏言濠反在旦夕濠諸奸邀諸途卽不得諸權奸得濠金錢多恐事泄并誅又幸冀非望往往匿不聞十四年言官合詞言濠必反狀上遣駙馬都尉崔元都御史顏頤壽太監賴義諭宸濠令改過府中人以爲名濠六月丙子因諸司入謝濠酒遂稱密旨反劫燧及副使許逵燧逵叱濠無反自速死吾死不從汝爲賊遂殺燧逵僞授士實太師養正國師吉太監春尚書凌十一等都指揮急走人令畢真反杭州爲應遣涂欽等攻九江南康王春等發旁縣諸賊黨九江南康城破七月壬辰進攻安慶知府張文錦守將崔文楊銳力禦不肯下濠以江西僉事潘鵬安慶人遣鵬招安慶文誅鵬家濠議僭大號改年順德士實養正言宜至南京正位然後改元布詔是時汀贛都御史王守仁已傳檄遠近討濠濠不敢離南昌已而聞守仁兵未集士實養正造僞檄指斥朝廷謂 上以莒滅郢 高皇帝不血食建寺禁內雜處妓女胡僧玩弄邊兵身衣異衣至於市井屠販下流賤品事靡不樂爲棄置宗社陵寢而造行宮於宣府稱爲家裏贖貨無厭荒遊無度東至永平

諸處西遊山陝三邊所過掠民婦女索取贖錢又謂
常懸都太監牙牌稱威武大將軍又謂旣奪馬指揮
妻稱馬皇后復納山西娼婦稱劉娘娘原其爲心不
能御女又將假此婦人以欺天下抱養異姓之子如
前所爲也畱萬銳拱條等守南昌僞勅吉提督軍務
叅政王綸叅贊軍務分諸賊爲五哨一百四十隊戊
戌直趨安慶庚子攻城不克甲辰以天梯攻又不克
安慶守益堅又聞守仁兵且至濠懼方欲退還南昌
丙午聞守仁辛亥破南昌擒拱條萬銳及濠子三哥
四哥濠大懼解安慶圍甲辰至樵舍乙卯遇守仁兵
黃家渡戰敗丙辰又敗丁巳守仁急督戰火攻濠大
敗婁妃投水死擒濠及其子大哥吉士實養正等濠
曰紂用婦言亡而我不用婦言亡上初聞濠反江
彬等幸出巡遊勸親征遂下詔暴其罪告郊廟革封
爵削屬籍親統六師征之詔未下守仁已擒濠濠六
月丙子反七月丁巳就擒濠反謀雖久意僥倖倚奸
人得竊位不欲顯言稱亂及事急反始掠省城兵器
燧已名討賊移外郡倉卒不能備拾賊又爲諸下邑
逼不得去諸僞將皆賊徒未嘗知戰士實養正徒以
區區文詞議論負時名不知兵諸附者皆富貴子弟

聞守仁倡義誅討未及見兵皆逃避去燧所置初城
遏賊不得逸盡就縛檻車至南京諸權奸得濠金錢
者尚在 武宗左右或握兵間通語言濠謂且得釋
獨忌守仁有權術兵精慣戰不敢動回鑿至通州誅
濠弋陽王拱積攝府事初獻王五子二子盤輝臨川
王天順五年罪廢爲庶人幽高墻三子盤煥宜春王
四子盤炷新昌王五子盤煥信豐王弋陽王者靖王
弟奠煜始封弋陽謚榮莊榮莊子覲鏖嗣弘治十年
卒謚僖順僖順三子長子及二子天季子宸泐弘治
十二年嗣正德九年卒謚莊僖莊僖次子拱積正德
六年封鎮國將軍嘉靖元年攝王府事二年嗣弋陽
王二十年爲稍設官屬子多焜嘉靖五年封鎮國將
軍存者八

吾學編

寧獻王權

寧獻王諱權 高皇帝十六子也生而神姿秀朗白
皙美鬚冉慧心天悟始能言自稱大明奇士好學博
古諸書無所不窺旁通釋老尤深於史洪武二十四
年冊封之國大寧大寧古會州地東連遼左西接宣
府北邊要鎮也所統封疆九十城帶甲八萬革車六
千諸胡騎又驍勇善戰王智略淵宏被服儒雅數會

邊鎮諸王出師捕虜肅清沙漠威震北荒建文中齊
黃用事疑忌諸藩多所出削以王英武擁重兵於邊
下勅召還京師王未命遂削王護衛軍靖難師因白
溝峴王已奪兵柄遂襲破大寧取其軍資佐師師復
振 文皇帝踐祚不欲壯王在外永樂元年二月改
封王於南昌王亦深自韜晦所居宮庭無丹彩之飾
覆殿瓴甃不請琉璃構精廬一區蒔花藝竹鼓琴著
書其間故終 長陵之世不被譴責 仁宣時法禁
稍解王乃得上書言事蓋一日而封九女又嘗請乞
南昌灌城一鄉土田及論宗室不應定品級事皆未
行晚節益慕狎舉自號臞仙建生墳緱嶺之上數往
遊焉江右俗故質樸儉於文藻士人不樂聲譽王乃
弘獎風流增益標勝海寧胡虛白以儒雅著名王請
爲世子師傅者七年告老而歸王爲輯其詩文序而
傳之凡羣書有繫風化及博物修詞人所未見者莫
不刊布國中所著通鑑博論二卷漢唐秘史二卷史
斷一卷文譜八卷詩譜一卷神隱肘後神樞各二卷
壽域神方四卷活人心二卷太古遺音二卷異域志
一卷遐齡洞天志二卷運化玄樞琴阮啓蒙各一卷
乾坤生意神奇秘譜各三卷采芝吟四卷其他注纂

數十種經子九流星曆醫卜黃冶諸術皆具古今著述之富無逾獻王者又作家訓六篇寧國儀範七十四章皆以忠孝恭儉垂訓子孫盟諸山川社稷之神有弗率訓範者受顯僇在位五十八年壽七十有一正統十三年九月望日薨世子諱磐斌孝友仁厚洞達理學有淵騫之譽正統二年正月十有九日先獻王薨世孫奠培嗣爵追謚爲惠王

寧靖王奠培

寧靖王奠培惠王子也髫髻踈髯尤敏於學才藻豐贍一意修文辭造語驚絕著仙謠却掃吟擬古詩二百餘篇皆雋遠有思致嘗撰文章大格式及古今法書各十餘卷松石軒詩評一卷其書法矯潔遒勁號曰鐵畫銀鉤然性孤介寡合卽諸父兄弟小有不愜動生猜嫌以故臨川弋陽虢爵皆王志也在位四十二年壽七十四弘治四年薨

弋陽端惠王拱楨

弋陽端惠王拱楨莊僖王子也闔爽有幹局初封將軍同藩諸將軍已屬目其賢會宸濠作逆伏誅諸郡王勢相頡頏莫能一上以王守正不阿詔令統攝府事嘉靖初上書請復獻惠二王廟祀得備禮樂稍

增設審理奉祠典儀諸官屬自藩臬諸司以下歲時皆入謁如大藩禮嘉靖十九年撫按奏舉王忠孝賢良賜勅獎勵已復奏修獻惠二王寢園嘉靖二十九年薨

樂安端簡王拱樞

樂安端簡王拱樞靖莊王子也靖莊樸訥鮮慧而王以文雅才辯著稱兼精繪事繪菊石妙絕一時又能謙和虛已煦諸宗人會弋陽端惠王薨羣情更屬王賢始奏析弋陽總理於是建安樂安弋陽三王分治八支王薨子多煥嗣爵

石城恭靖王奠堵

石城恭靖王諱奠堵寧惠王第四子而謀璋之始祖也景泰二年冊封性莊毅簡貴寡言笑家法甚嚴子孫小違教者輒繫而笞之內外日凜凜從事時諸郡王多坐驕蹇淫虐見法王獨謹度秉忠未嘗有過舉在位三十六年成化二十二年正月十有二日薨子鎮國將軍諱覲鏞孝友慈惠動必以禮先恭靖一年卒子宸浮嗣爵追封端隱王

弋陽奉國將軍多煌

弋陽奉國將軍多煌僖順王曾孫也父拱檜豪爽喜

客善詩著負初集二卷煌恂謹孝友與弟炆燦焯皆
用文雅結友徧遠近子弟羣從莫不解藝善書一門
之內讎讎焉弋陽恭懿絕嗣諸宗人舉煌賢能兩臺
采輿論上之 上遂勅煌攝弋陽府事瑞昌諸宗皆
屬焉煌性廉靜寡欲子壯趨趨重又嫻詞藻善承父
志政暇輒開逸園讌賓從雅歌投壺賦詩以爲樂著
委蛇集四卷先是熊淑人早卒將軍鰥義不更娶獨
處齋閣者二十六年萬曆癸巳冬兩臺疏舉煌政勤
行誼高等 上方欲下詔褒予會煌病卒 詔遣郡
太守加祭一壇蓋殊典云

奉國將軍拱杓

奉國將軍拱杓瑞昌恭僖王後也性樸茂好學善草
書始杓父渠爲濠累逮繫中都杓請以身代嘉靖十
三年冬 賜勅褒獎已復上大禮頌一章年八十有
九乃卒子多斫好文雅以孝行聞舉宗正未果萬曆
二十二年薦攝瑞昌府事 命始下而斫卒

奉國將軍拱搖

奉國將軍拱搖字茂材瑞昌拱杓弟也博辯儒雅有
智數嘉靖九年冬上書請建宗學并詔宗室設壇墀
行耕耒禮謹祀典加意恤刑後以議禮稱 旨賜勅

褒諭又嘗捐田白鹿洞贍來學者與允枏並以聲譽
致諸貴遊子鎮國中尉多熿字宗良博雅好修辭賦
典麗始與多燿齊名晚益折節虛已獎掖後雋草書
茂美有晉法給事中張應登薦堪宗正者於南昌則
首舉熿後病痿不廢吟諷譚藝者並宗尚之

奉國將軍多燿

奉國將軍多燿字用晦瑞昌拱樹子也始公族習爲
豪侈貴倨樹獨折節縉紳間以儒素督率子弟以故
燿一意修詩書工苦特甚里人余曰德與李攀龍王
世貞遊爲詩燿因德延譽海內然性簡貴矜莊舉止

多僻族人莫不屬目而遠之晚節益嗜黃冶閉關絕
慶弔禮再舉宗正而毀者益衆悒悒不樂卒是時建
安輔國將軍拱榭樂有鎮國將軍多燂並以文雅著
名燂尤嗜古傲物榭著瑞鶴堂詩集爽臺集各二卷
燂著支離市隱集北郭子魚樂詞三十餘卷

奉國將軍多烜

奉國將軍多烜字貞吉弋陽多煌弟也穎敏絕人善
詩歌兼精繪事見古名人墨蹟一再臨之如出其手
赤牘小札日可百函語語有致始與宗人熿境境等
結詞社久之遊道益廣海內譚藝者莫不知有貞吉

嘗輕裝遠覽山水蹤跡徧吳楚間所至傾坐家居以
精鐵冒門闥賓客雜沓未幾鐵復鎔去晚病尪羸良
苦猶吟咏不廢臨絕時操筆作帖命子墀等以白幘
鶴髦斂櫪側並鐫勒銘識門人子弟私謚曰清敏先
生所著五遊編勸遊編凡七卷梓行於世時樂安有
輔國將軍多燾亦雅有詩癖造語新奇與族人埤埤
埤埤修竹林之遊放志文酒夜以繼日終其世無忤
也竟病酒後貞吉一年卒

輔國將軍拱概

輔國將軍拱概石城端隱王之孫鎮國公宸深第二
子也鎮國公性嚴重方正家法整肅宸濠欲屈之數
遣人火其居而諷宗族資佐公以示惠公固辭不受
以故濠敗獨免污巉輔國公醇孝篤誠動以禮義自
檢處暗室屋漏終無惰容日稱述先賢懿行訓誨諸
子孫嘗作家訓一篇其辭曰若幸弛負擔而嬰爵祿
母以世及罔或譽於禮汝母侈於聲母酒於酒母作
驕淫母噐於訟以顛覆厥家汝有子若孫迪以詩書
母姑息是肆以戕厥性汝友朋以臧勿邇便佞善柔
母豐殖貨賄以賈怨汝御臧獲羣隸亦維莊厥身維
孝維忠克昌厥後母事巫覡左道汝祖 高皇帝尚

有垂訓念之哉 今上御極上尊號 兩宮覃恩中
外公以年高有德再沐 詔書存問壽八十有四卒
長子奉國將軍諱多燿恭惠端謹好經術以敦睦著
稱娶俞淑人生謀璋奉國公常自督課授五經史漢
旁及星曆萬曆乙酉卒萬曆辛卯冬給諫葉公初春
疏請設江西宗正舉謀璋學行萬曆癸巳冬撫按兩
臺議增石城管理疏薦璋於 朝明年奉 勅管理
石城王府事得刑劾不法者石城自宸浮弘治中坐
事廢無王迄今九十有四年矣於是始得奉朝請攝
行王事所轄爵宗二百九十三人庶儀不與焉

俱藩
獻志

岷王傳

岷王榘初封岷州洪武二十六年建邸雲南二十八
年之國建文初廢爲庶人流漳州靖難初復王王與
西平侯沐晟交惡 上賜書諭王名戒晟仍還鎮未
幾驕橫收印章殺官吏激變夷人沈湎廢禮 上怒
罪其府僚奪冊寶尋念王建文中久囚繫復與冊寶
洪熙元年徙武岡無王宮寄居州治久之始建王宮
宣德元年岷世子徽煇輒赴京奏事勅止之途不止
乃徽煇與奄謗其弟徽燦也 上爲斬奄遣徽煇歸
景泰三年乞移湖廣善地不許王卒謚莊時徽燦已

封鎮南王矣莊王無子鎮南王嗣王王弟廣通王微
燝謀反以蒙能陳仔李祥爲總兵事覺廢爲庶人
四年王乞朝明年正月不許卒謚恭子音堃嗣卒謚
子膺鈺嗣卒謚簡子彥汰弘治十七年以江陵王
封世子嗣王嘉靖八年江川王膺燧請加祿戶部尚
書梁材言岷府郡王歲祿五百石米鈔兼支制也不
許初彥汰與其弟南安王彥泥訐陰事彥泥廢爲庶
人彥汰坐荒淫敗度抗制擅權幽囚嫡母焚死逼迫
多官稱臣亦革爵爲庶人令其子世子譽榮攝理府
事嘉靖十年譽榮爲父乞恩辭攝府禮官以見潛鍾
鍍比奏授彥汰冠帶理府事十二年彥汰乞復王不
許十五年上兩宮徽號詔復彥汰王吾學編
二十三年卒謚靖嫡子譽榮二十五年嗣三十一年
卒謚康子定耀三十四年嗣子幹跬萬曆三年封南
充王繩蟄錄

大明南渭莊順王神道碑

呂調陽

南渭王曰岷府分封永州迄莊順王蓋四傳矣世以孝友雍睦聞於藩國桂林史氏呂調陽往典館局得稽其故實有桂林於永州猶堂戶然其知頗悉云王之薨也調陽方讀禮廬次其輔國將軍定焯具事狀遣儀賓張大訓詣桂林請銘神道之碑調陽竊附知王之末誼不敢不銘謹按玉牒冊王諱譽播洪武中高皇第十七子封岷王雲南洪熙元年陟王武岡謚曰莊順王生恭王恭王次子始封南渭王永州謚榮順榮順生懷簡王懷簡生安和王自恭王至安和

爲王高曾祖若考也王幼穎慧兒時母吳太妃口授章句卽記憶不忘懷簡嘗抱置膝上曰他日光吾緒業必此兒也孝友天性太妃遘疾久不愈晝夜侍湯藥衣不解帶者逾月不懈居太妃與安和王喪哀毀如不欲生發引日往返徒跣觀者感歎以爲儒生弗及也與二弟鎮國將軍譽樅譽格極相友愛安和時買民田若干皆上腴之產盡以付二弟且爲歲輸糧於官格嘗感疾之兩嶽避崇王中夜聞之輒起亟呼人追請寢食俱減及返而後安侍宗衆尊卑行次曲有儀度庶人某某自懷簡安和時構訟三十年不相

下王從容酌卮酒諭以祖宗訓制且爲奏請冠帶婚資月糧二庶人感激叩首不敢復有異慮與士大夫處款曲有情若布衣交不知其爲王也教授楊仁重年老乞休厚贈之還舟車護從皆親爲點閱臣僚無不感激思報者湖南水荒饑民十數人盜王困谷爲守者所覺輒擒以獻王不忍加罪曰彼爲饑餓所迫耳乃悉以餘穀賜之其人愧謝去終爲良民性樸素自號石巖山人居常衣布陳都憲仕賢分巡湖南時見王所服歎曰昔人布被人曰詐殿下布衣人曰儉布一也人曰儉不曰詐難能也僻好讀書然

不泥章句意興所到作爲古文詞不事雕綴而天趣
暢發狀稱經史百家莫不涉獵則令德所成雖其天
資粹美亦學問之益也龐貌豐頤指爪長數寸自謂
奉先人之遺體動不敢傷之未薨前自撰壙誌藏之
篋中臨終呼焯至榻前手書遺訓數百言點畫不苟
因誦一日洞然無別體方知不枉費工夫之句端坐
而逝其達生委順如此嘉靖丁未始受 冊封越庚
申九月二十四日薨襲爵十有四年距生弘治壬戌
九月十七日辰時得壽五十有九計聞 天子震悼
輟朝遣胡行人維新諭祭 命有司庀喪事賜謚莊

順卹典加隆焉配妃蔡生王在壯年以諸子相繼天
卽請於安和育弟格子焯於官中撫愛篤至教以義
方焯亦善能承順事王三十年曲盡子道居喪稱孤
稱不肖終始無間可謂慈孝兩得矣薨之明年二月
二十一日辛亥葬於孝友山

谷庶人

谷庶人穗母郭惠妃滁陽王女也生三王長蜀王次
代王次如意王或曰卽谷王也洪武二十六年建邸
宣德卽上谷建文初靖難兵起庶人走還京靖難兵
至穗守金川門登城望見 成祖麾蓋開門迎 成
祖 成祖入卽位 賜穗樂七奏衛士三百及金銀
鈔馬加祿歲二千石官其護衛指揮僉事張興都督
僉事儀衛正張成成都指揮使已而改封長沙之國驕
橫尚書茹瑋不謁穗下詔獄死穗益肆無忌造戰船
弓弩器械招匿亡命習兵法戰陣日與都指揮張成

宦者吳智劉信等謀呼成師尚父智信國老令公成
智信亦輒應僞作讖書以爲讖有十八云我 高皇
十八子陰傳播惑衆製巧燈上獻擇壯士入朝架燈
又選壯士習音樂與燈並上乘隙爲變奪民田侵公
稅殺無罪人長史盧廷綱屢諫不聽誣磔殺廷綱張
興懼禍及已因奏事北京白其狀 上未信興過南
京啓 太子曰臣冒死聞上 上顧不信臣言臣萬
死願殿下垂聽憶臣言他日得無連坐滅臣家臣死
不朽懋又遣劉信持所爲讖致書蜀王爲隱語曰德
蒼時不可言桓文之事桓文時不可言德蒼之施欲

結蜀王爲援蜀王切責不聽已而蜀王子 寧王悅
燔得罪父投懋懋納悅燔因詭衆曰往年我開金川
門出建文君建文君今在我官中我將舉事爲建文
君復辟事將發會蜀王上變告永樂十四年七月
上見蜀王疏歎曰朕待懋厚不宜有此心蜀王忠孝
又不宜欺我張興嘗爲我言我不忍信今果然立命
中官持勅諭懋令懋遣悅燔還蜀懋不意使猝至不
得已就徵十月至京入見 上以蜀王章示懋懋頓
首自伏言死罪成國公朱勇都御史劉觀諸大臣廷
劾懋曰周辟管蔡漢戮安長皆大義滅親 陛下縱

念棟柰天憲何 上曰棟朕弟朕且令諸兄弟議明年正月楚王楨等各上議曰棟違 祖訓謀不軌踪跡甚著大逆無道罪誅不赦 上曰諸王奉大義國法固爾吾寧生棟二月削棟及其二子賦灼賦燭爵爲庶人誅諸通謀者興以先發庶人罪狀得不坐

吾

學編

韓王傳

韓王松初封開原洪武二十七年三月 上令王及藩王省秦晉燕周齊王分道而行至秋八月始還永樂五年卒葬南京謚憲子翀熾永樂八年嗣二十二
年改國平涼 宣宗初請徙江南不許言居第隘遣主事毛俊經度并建襄陵樂平二邸及岷州廣福寺陝西守臣言歲歉 詔止勿建王又言傷廬已撤即冬寒工力愈難 宣宗令繕王宮罷廣福寺又允王請蠲護衛三年屯種境內無鹽王請鹽 詔許王易鹽正統元年上書陳邊防 上褒答正統五年卒謚

恭子範圯正統七年以開城王嗣王九年卒謚懷弟
範抑正統十一年以西鄉王嗣王景泰元年卒謚靖
子徵針景泰元年以高陵王嗣成化五年卒謚惠子
偕流成化五年以廣安王嗣王十年卒謚悼弟偕瀟
成化十二年以彰化王嗣王弘治十四年卒謚康無
子弟之子旭樾弘治十七年以通渭王嗣王嘉靖十
三年卒謚昭子融燧嘉靖十五年嗣請食鹽食茶戶
部言茶易戎馬鹽供邊餉不許世子謀典諸王惟韓
士瘠祿薄人眾甚貧往往凌劫有司平涼知府吳世
良鄺珩任守德王松皆被窘辱旭樾等百五十人至

闡總制尚書嘉靖十五年撫巡黃臣周鈇疏於朝榜

諭禁戢

吾學編

四十四年王卒謚定嫡子謨典封世

子先卒子朗錡四十五年以鎮國將軍進封世孫隆

慶三年嗣嫡子璟法隆慶四年封世子

繩螿錄

韓恭王翀烱

韓恭王諱翀烱憲王子也憲王始封開原未之國而

薨永樂八年王襲爵二十二年出封平涼平涼北接

邊徼虜眾數充斥境上王習見邊防利害扼腕憤邑

正統元年 上書極言時事 英廟報曰承諭邊計

至悉足見叔祖惓惓以宗社國家爲心深思遠慮雖

虞得金 卷之一 八十五
古賢王不是過也賜璽書慰勞并賚金幣正統五年
薨薨後九年而有土木之變

襄陵莊穆王翀焮

襄陵莊穆王翀焮韓憲王第二子也孝友篤至過人
母季嘗病甚王顙北辰下刲股爲藥愈 頓愈
及母卒毀瘠終喪每當展墓率子孫躬鋪畚以培塚
土恭王之疾也王日視湯液累月不獲治其私家至
或衣不解帶喪極其哀正統己巳虜野先犯順王赴
京師勤王會虜解去 璽書勞焉嘗憤虜衆憑陵華
夏成化六年夏上書請率子壻首擊虜報國自効

璽書褒予成化十三年薨壽七十七子範址嗣爵是
爲襄陵恭惠王恭惠亦敏學篤行母荆久罹危疾醫
已束手弗能療恭惠五色無主禱諸神乞以身代遂
刲股和湯進母母竟獲全景泰元年七月事聞 璽
書褒美之恭惠之子徵鈐是爲安穆王安穆之子偕
淵是爲端和王端和之子旭撞是爲懿簡王自莊穆
至於懿簡五世同居言必及義雍雍肅肅皆以孝友
相師嘉靖十一年 上嘉其親睦遣書褒之賚以羊
酒文幣夫人杜氏樂平輔國將軍徵鑣之室也已聘
未婚成化十六年冬徵鑣病卒父母將謀改聘杜自

謂身已許饑貴矣願歸饑家志操甚厲韓康王爲言
於朝乞賜旌表 詔封杜氏爲輔國將軍夫人

潘獻志

潘王傳

潘王模趙貴妃子洪武二十四年封永樂六年之國
潞州 宣宗時王言諸子婚請展府府垣外盡民廬
也 上曰毀民廬以展王府不可令工部往閱繪圖
來聞宣德六年卒謚簡子佶焯初封武鄉王宣德八
年嗣王景泰中王父子與州官數置酒大會巡撫朱
鑑上聞 上令諸王非時令萬壽節不得輒會有司
飲酒著爲令天順元年卒謚康康王九子長天次幼
學天順三年嗣正德十三年卒謚莊莊王七子長銓
鉦正德十三年以西陽王封世子嗣王嘉靖六年卒

謚恭無子次銓鉢初封靈川王謚恭懿以長孫胤移
嗣瀋王贈瀋安王恭王二子長勛壯初封福山王謚
恭和以子胤橙嗣瀋王贈瀋靖王靖王二子長未名
封次胤橙初管府事後嗣王卒謚懷無子安王銓鉢
四子長勳潛初襲父靈川王卒謚恭裕以子胤移嗣
王贈瀋惠王次勳燧勳澈皆鎮國將軍四子未名封
惠王二子長胤移初襲祖靈川王懷王元子嘉靖十
年諸郡王爭嗣王 上冊胤移嗣王胤樞封鎮國將
軍管靈川王府事胤移五子長未名卒次恬焯封世
子 吾學編

二十八年王卒世子恬焯三十一年以世子嗣子理

堯封世子

繩螿錄

安王傳

安王楹洪武二十五年封平涼永樂十五年卒謚惠
無子國除盡革府寮及樂戶畱典仗校尉百人守園
洪熙初封韓恭王平涼襄陵莊穆王翀炆者恭王子
也支封附王國中 英宗令官校隸韓長史供安王
祀暇日給襄陵王使令景泰五年翀炆乞承祀安王
正德十二年嗣襄陵王徵鈐遂得請樂戶祀安王明
年樂平王徵鈐援鈐例亦請樂戶禮部言親王有樂
戶郡王別城居者有事假鼓吹有司其附親王國者
假樂戶移長史司因併革安王供祀樂戶嘉靖二年

徵鈐及韓王旭橧又請 上以安王故特允徵鈐徵
鈐卒韓王融燧又令長史革祀安王樂戶長孫旭橧
上言禮樂自天子出韓王不得擅予奪融燧亦言親
王郡王禮樂宜有降殺事下撫巡不能決條奏請
制曰與樂戶爲安王祀也 吾學編

焦太史編輯國朝獻徵錄卷之一

